



Uniun da dunnas Glion

Donaziun 2024 ord la stizun da secund maun

«La Trucca»

Dapi igl atun 2020 meina l'uniun da dunnas da Glion la stizun da secund maun «La Trucca» el marcau vegl da Glion. Naschida ei quella stizun entras ina collavuraziun cun l'uniun da dunnas da Zumikon. Il sortiment secumpona da vestgadira, calzers ed accessoires per affons, dunnas ed umens. Il sortiment seresulta ord massa custeivlas donaziuns da vestgadira da persunas dil contuorn da Glion, mo era da pli lunsch naven, sco era ord la cumpra da vestgadira dalla stizun da secund maun da Zumikon, la qualla succeda duas gadas ad onn. Il team dalla Trucca dat gronda peisa sin vestgadira bein mantenida per il sortiment.

Dapi 2023 scriva la stizun cefras positivas, aschia sa ella far ina donaziun ina ga ad onn ed ademplescha aschia la finamira dalla stizun, numnadamein da sustener cun in ton dil surpli dallas entradas instituziuns el Grischun.

Avon zaconts dis ha l'uniun da dunnas da Glion saviu surdar ord il surpli dallas Entradas 2024 dalla Trucca la summa da 4'500.- francs all'uniun TECUM, che accumpogna persunas malsaunas e moribundas e lur confamiliars (www.tecum-graubuenden.ch). L'uniun TECUM accumpogna persunas en grevs temps, seigi da malsogna ni da murir, a casa, en casas d'attempai ni el spital. Ella ei cheu per las persunas pertuccadas e per lur confamiliars. Ils accumpignaments ein gratuits, els succedan sco lavur voluntaria. L'uniun ei vegnida fundada igl onn 2000, pli che 400 persunas ein vegnidas scoladas dapi lu sco accumpignader ni accumpignadra da malsauns e moribunds. Duront quels onns han pli che 5000 accumpignaments tier persunas grev malsaunas e moribundas giu liug.

L'uniun da dunnas da Glion ed il team dalla Trucca ein ventireivlas che la donaziun d'uonn ei ida all'uniun TECUM e perschudadas ch'ils daners van en in bien liug.

Nus giavischein all'uniun TECUM vinavon bia buns carstgauns ch'adempleschan quei custeivel survetsch per concarstgauns malsauns e moribunds.

Per l'uniun da dunnas da Glion: la suprastonza, Lucrezia Berther, Bettina Grolimund-Müller, Vreni Caduff-Egger